

January 1935

龍溪書院考略

Shixu ZHENG

Follow this and additional works at: https://commons.ln.edu.hk/ljcs_1929

Recommended Citation

鄭師許(1935)。龍溪書院考略。《嶺南學報》，4(1)，155-174。檢自：http://commons.ln.edu.hk/ljcs_1929/vol4/iss1/7

This Article is brought to you for free and open access by the Scholarly Publications of Lingnan University (Guangzhou) at Digital Commons @ Lingnan University. It has been accepted for inclusion in 嶺南學報 Lingnan Journal (1929-1952) by an authorized editor of Digital Commons @ Lingnan University.

龍溪書院考略

鄭師許

楔子

本年三月間，嶺南學報委員會有廣東專號之輯，而尤注重於地方文獻，以余生長東莞，囑為龍溪書院考略，辭不獲已，乃撫拾遺聞，輯為是稟，非云詳備，聊以供參考而已。茲擬分為：

- 一、建置沿革
- 二、院址及外館
- 三、經費來源
- 四、作育述要
 - 甲、山長
 - 乙、生徒
- 五、廢棄始末

五項，就其文獻足徵者彙述如下，惟賢達者正之！

一、建置沿革

龍溪書院始建於清乾隆四年（公元一七三九年），為知縣印光任率紳士所倡建。袁枚隨園文集云：『印光任字黼昌，江南寶山人。雍正四年

(公元一七二六年)舉孝廉方正，以知縣發廣東。初署石城，實授廣寧，調高要。乾隆二年(公元一七三七年)知東莞縣事。東莞彭志稱其爲政平恕，嚴吏胥，杜請託，豪猾屏息，勤於造士。捐俸遷建寶安書院，增膏火田七十畝。暇進諸生講學論文，娓娓不倦，士民愛之如父母。東莞彭志，龍溪書院條云：『在石龍鎮，乾隆四年知縣印光任率紳士倡建』。此龍溪書院始建之大略情形也。


其後在道光元年(公元一八二一年)重修。廣府戴志云：『龍溪書院道光元年知府羅合章率知縣暨戎廳京山兩屬士民重修』。羅曾任東莞縣知事，喜獎拔士類。東莞陳志云：『羅合章雲南景東廳人，乾隆五十七年(公元一七九二年)舉人，嘉慶六年(公元一八〇一年)大挑知縣，分發廣東，署封川，以事落職。九年(公元一八〇四年)投効海疆，敘功擢知州。十一年(公元一八〇六年)署邑令。喜獎拔士類，於龍溪，寶安兩書院尤注意。尋調署海安同知，升惠州府知府。二十五年(公元一八二〇年)調廣州。逾年，率邑令及戎廳京山兩屬士民重修龍溪書院。復判分龍溪，寶安兩院膏火。道光二年(公元一八二二年)復姓爲程。是年秋巡撫廣東，甫下車，邑紳尹廷鐸等請撰龍溪書院碑記，合章勉以勿尙文辭，而忘聖賢遠大之業，勗勵甚至』。然則此次重修，實爲合章所主動，而其邑紳尹廷鐸等參與其間。至於是年邑令何人，以及後此有無再修，則尙待查考。

二、院址及外館

院址在石龍鎮。南越遊記云：『東莞石龍鎮爲廣惠二州舟楫往來必經』。以箸者兒時聞之父老，石龍鎮實爲東江上溯潮梅，直達漳厦之總樞紐。當時海運未通，福建之茶，烟，東江之紙，均由此以輸運廣州，佛山，其

衝要爲全省冠。自清末展築廣九鐵路經其旁，客貨不聚，乃日漸衰落耳。

試繪畧圖於下，以代說明。



故當時建置書院於此，其文化所及，不僅及於一鄉一邑而已。

其後書院傾圮日甚，於道光元年（公元一八二一年）重修本院。其時

又以院址太隘，復於水南頭建置書院外館，蓋所以爲多庇寒士之計也。東莞陳志龍溪書院外館條云：「在水南頭，道光元年邑人尹廷鐸等倡修龍溪書院，以丙舍無多，增築外館，閱三年始成。巡撫程合章有記」。程合章卽羅合章，事詳前。茲附錄其記於下，以明顛末：

政莫大乎培養人才，以供國家之用，而化民成俗之道，卽在其中，則書院是已。道光壬午冬，奉命巡撫粵東，甫下車，東莞紳士尹廷鐸等來言：「龍溪書院傾圮已久，前蒙捐金爲倡，士民踴躍，鳩工庀材，始事於辛巳六月，就舊址葺而新之，規模視昔有加。特以亥市雜處，丙舍無多，不足以大庇寒士，謹遵前諭，擇距舊基里許水南鄉之種花地，增築外館一所。北枕羅浮，南臨杯渡，山川映發，水木清華，洵造士之勝區，藏書之福地也。斤斧三年，聿成院宇三大進，翼以兩廂，環以園牆。新舊兩院，計費萬金。擬於明年正月落成，請爲文以記其事」。余曰：「美哉斯舉！既葺其舊，復增其新，可不謂勤乎？雖然，斯院之設，豈徒供諸生會文藝，取科第，爲鄉黨光榮已哉。必將明體達用，爲國家棟樑柱石之材。且夫學莫先於立志，立志莫要於法古，法古莫要於讀書。蓋書傳所云，自天地名物之理，修齊治平之道，與夫聖賢之言行，古今之得失，下而至於食貨之源流，兵刑之法制，莫不畢載其間。賢豪傑士，觀其本末，必有以激發吾之志氣，開拓吾之心胸，增益吾之聰明聞見。逮行成名立，凡所爲功名事業之本，皆於是乎在矣。自正學不明，世之爲士者，非不讀書講學，而所求於書者，不越乎記誦詞章之末以釣聲名干利祿而已！是以志趣日以卑陋。朱子有言：『書愈多而理愈昧，讀書愈勤而理愈肆，浮名愈盛而其行誼德業愈無以逮乎古人。』夫讀聖賢之書而不通於心，不有於

身，猶不免爲書肆，况所讀者之又非聖賢書乎？東莞爲羊城之左臂，而石龍則東莞之上游，其地廣大而寬平，其民繁庶而殷富，考之志乘，奇人傑士，代不乏人，迄今科名仕宦，猶絡繹不絕。士非不足於文者。余懼其僅知有文而忘聖賢遠大之業也。於是乎書。

三、經費來源

初龍溪書院經常費與寶安書院相合，正課生童膏火做照粵秀越華書院支給辦法。東莞彭志云：「乾隆十三年（公元一七四四年）知縣王灝撥入徐屋洲租銀二十兩。又詳奉藩憲撥入八社峴塘租銀五百兩，充寶安，龍溪兩院修金膏火。三十九年（公元一七七四年）署知縣宋清源增撥牛側沙租銀二十三兩零。（其在撥數已被水冲刷者不載）嘉慶元年（公元一七九八年）知縣彭仁傑又增撥牛側沙坦稅新陞租銀三百八十九兩零。增兩院正課生童膏火，仿照粵秀越華書院，定立規條，在院肄業者，方准全支。每月三課，扃門命題，酌加賞罰。是在嘉慶初元，全年經費，祇合九百三十二兩零，爲寶安、龍溪兩院修金膏火之用。其後撥兩院膏火一千兩。至嘉慶二十五年（公元一八二〇年）由羅含章判定本院經費與寶安書院劃分。東莞陳志云：「仲振履字臨侯，號雲江，江蘇泰州人。嘉慶十三年（公元一八〇八年）進士，二十一年（公元一八一八年）署邑事。精於校士，縣考前列，多雋才。念書院爲育才地，撥南新洲租千兩，以增寶安，龍溪兩書院膏火」。廣東阮志云：「嘉慶二十三年（公元一八一八年）知縣仲振履又撥南新洲租銀一千兩，增兩書院修脯膏火。嘉慶二十五年（公元一八二〇年）知府羅含章判定該縣兩書院膏火。從前合而爲一，原可通融，今鄉間既欲修復龍溪書院，自當將龍溪書院應得膏火撥還，以符原

案。內除牛側沙稅一項六畝租銀三十四兩九錢八分，又牛欄二沙坦稅四十畝租銀十兩，原詳撥歸寶安書院，應專歸寶安書院。又四隅義學，係在城內，原撥梧州稅租銀，應專歸寶安書院。又徐屋洲坦稅二十畝，租銀二十四兩，原詳撥歸龍溪書院，應專歸龍溪書院。均無庸議外。其牛側沙正坦八頃九十四畝六分二釐五毫，租銀二百九十五兩二錢二分六釐；又牛側沙溢坦四頃二十六畝五分零七毫六絲，租銀一百四十兩七錢四分八釐；又入社規塘租錢五百兩；查核詳定原案，係寶六龍四分派，應照原案定議，以六分歸寶安，四分歸龍溪。至南新洲租銀一千兩，原詳係撥歸寶安，龍溪兩書院膏火，亦應照寶六龍四分給。毋得以將來添建書院，各半均分爲詞。蓋自是以後，龍溪書院始有獨立經費，而來源亦確實可靠也。

四、作育述要

考書院之作用，原以作育人才爲最要。惟龍溪以規模未宏，廢置已久，當時文獻，早已雲散風流。詢之邑人，能道其詳者蓋寡。余生也晚，未嘗廁身其間，近且久客江南，十餘年未歸，欲搜集故鄉文獻，而有志未逮也。幸太老師張豫泉世丈，同寓海濱，特爲此事，懷鉛置槧，日侍其側。豫丈榜名其淦，舊爲龍溪書院正課生，與陳子礪丈同侍太姻丈容青田公講席，晚年爲龍溪山長七年，於當時作育之盛，略能記憶。今更參稽陳子礪丈新修之東莞縣志（本文簡稱東莞陳志），豫丈舊著吟芷居詩話，東莞詩錄，校其文獻之確可徵信者，分山長，山徒兩項，略述於左。至其教規，月課，諸大端，則俟諸異日蒐訪焉。

（甲）山長

山長之職，與今日學校校長相類，而其責任則較重。大率當時必須

經明行修之人乃克當之。龍溪書院因爲地理環境關係，其地位與惠州府之豐湖書院，肇慶府之端溪書院相當，故所聘山長，頗多傑出之士。可惜文獻不足，今日可得稱述者，祇有：林茂封，黃之球，盧應，鄧淳，韓榮光，陳澧，蔣理祥，容鶴齡，鄧佐槐，黃萼，崔永安，張其淦，桂拈，尹慶舉，十四人而已。茲分別述說於下：

林茂封 茂封字松次，東莞縣人。蒲封季弟。少孤，撫於諸兄。博通群籍，善屬文，工行楷，弱冠補弟子員。諸兄沒，甫壯卽主家政，以身率教，財帛無所私。邑令俞亦臨，戴求仁重其行，先後延主龍溪，義學講席。多所成就。東莞陳志載其賽海神詞四首云：「三月江城賽海神，軟風遲日颺輕塵，金鏡彩仗透迤出，繪盡承平錦繡春。夾道霓裳舞袖輕，玉簫金管入雲清，春風吹滿千門裏，盡是鈞天廣樂聲。寶蓋陰圓旛影重，銀鞍小隊結芙蓉，當先騶裊誰家子，半領鵝黃粉黛濃。凌波直渡碧江濱，甲帳當塗列衆芬，遙盼風車纔過處，煙絲萬縷結香雲」。其香艷不減溫李。惟茂封性端厚，少有成風規，生平不面斥人過，而有過者亦竊忍聞之，人謂克肇道學家聲云。乾隆四十八年（公元一七八三年）癸卯歲貢，未幾卒。（據東莞陳志）。

著書：拙存齋詩集。未見。

黃之球 之球字天玉，號侶石，東莞縣人。弱冠應增城縣考，補弟子員。雍正四年（公元一七二六年）丙午以詩經領鄉薦，五上春官不第，截選知縣歸，隱居不仕。邑令印光任，王灝屢聘主寶安，龍溪兩院講席，邑中名士，多出其門。（據東莞陳）

志)。

著書：棠棣集（與其弟之琪合稿）未見。

盧應

應字錫垣，號梅關，東莞縣人。少聰慧，精制藝。爲諸生時，學使吳鴻器之。偕赴湖南襄文衡焉。乾隆二十七年（公元一七六二年）壬午領鄉舉第二。三十一年（公元一七六六年）丙戌成進士，選庶常。旋授檢討，入直武英殿，充國史館纂修，四庫全書分校。念嫡母陳年臻八十，乞終養歸，家居謙和，非公事，未嘗干謁，大府雅重之。聘主粵秀書院，應恐違色笑，辭不就，改主龍溪書院，及寶安書院講席，凡二十餘年。邑士出其門者甚衆。（據東莞陳志）。

著書：（有詩集曾錄入東莞詩錄中）

鄧淳

淳字粹如，號樸菴，東莞縣人。嘉慶二年（公元一七九七年）補府學生員。嘉慶二十三年（公元一八一八年）阮元督粵，纂修廣東通志，命淳采訪東莞事，淳修東莞草志五十卷以進，旋命入局，增刪明以前列傳。道光元年（公元一八二一年）辟舉孝廉方正，粵督盧坤，重其爲人，聘主龍溪書院。東莞詩錄錄有：乙丑歲暮龍溪講院感懷詩，「虛堂寂寂一身閒，心戀從書百慮刪，時命憑天成定局，勞生借酒壯衰顏，俗仍未免癡奚賣，詩尙難工祭亦頑，瑟縮袁安眠不穩，夢魂夜夜繞梅山」。乙丑爲嘉慶十年（公元一八〇五年），淳二十八歲。又六十自述詩有：「臬比濫擁兩經霜」，註云：「時主龍溪書院講席」，疑爲兩度掌院，否則曾爲該院正課生也。嘗手輯嶺南從述六十卷，徵用書目凡五百五十，稿五

易而始成。其後林則徐督粵嚴禁鴉片，淳爲條陳善後十策。道光二十一年（公元一八四一年）又上平夷諸策。爲人言方行規，不愧儒林之選，生平著述甚富。（據東莞陳志，吟芷居詩話，鄧俠嶺南从述集後跋）。

著書：粵東名儒言行錄二十四卷。存。（道光刻本）。

嶺南从述六十卷。存。（道光庚寅刻本，道光乙未補刻本）。

家範輯要二十卷。存。（道光刻本）。

主一齋隨筆十二卷。未見。

乾惕錄二卷。未見。

寶安詩正六十卷。存。（吟芷居詩話云：余之得據以成東莞詩錄者，徵君力也）。

鄧氏獻徵錄八卷。未見。

樸庵存稿八卷。附贈言一卷，年譜一卷。未見。

東莞縣草志五十卷。未見。

樸庵遺文三卷。未見。（據吟芷居詩話云：舊藏東莞蘇澤東處）。

韓榮光

榮光字珠船，博羅人。嘉慶十八年（公元一八一三年）癸酉科拔貢生。官御史，有直聲。工詩善畫，時推三絕。以母老乞養歸。主講龍溪書院。其龍溪竹枝詞第十首云：「我住龍溪已四年，採風問俗弔前賢，竹枝歌付雙鬟唱，譜入銀箏錦瑟絃」。居龍溪久，莞人善詩者多出其門。（據東莞陳志）

著書：黃花集。存。何仁山校刊。

陳澧 澧字蘭甫，番禺縣人。道光十二年（公元一八三二年）領壬辰鄉舉。十四年（公元一八三四年）被選為學海堂專課肄業生。問詩學于張維屏，問經學於侯康。二十年（公元一八四〇年）補學海堂學長。六應會試不第，大挑二等，選授河源縣學訓導。兩月，告病歸。揀選知縣。到班不願出仕，請京官職銜，得國子監學錄。為學海堂長數十年。咸豐十年（公元一八五三年）曾為龍溪書院山長，與莞人往來甚密。東莞陳伯陶，張其淦等出其門下，其序蔡守白詩云：「東莞陳君友珊，言其鄉蔡君守白，用玉台新詠詩題集玉台新詠句為五律二百餘首，工妙不減黃石牧香屑集。蔡君沒已久矣，舊有刻板，欲刷印以貽朋好。余聞之，願先觀為快，後數日友珊復與蔡君之姪煦春來，以舊印本見示，余循覽一過，歎其工巧，雖刻意自為之，亦未易得此，誠如友珊之言」。友珊名銘珪，即伯陶之父也。時澧方為東塾讀書記，日手注疏一篇，莞人士請益者隨問隨答，無不愜其意而去。同治六年（公元一八六七年）秋，運使方濬頤創設菊坡精舍，聘為山長。生平讀書，心有所得，即手錄之，積數百冊。漢學宋學，能合其通。東塾讀書記尤精粹。（據東莞陳志，吟芷居詩話，汪宗衍陳東塾先生年譜彙。）

著書：漢儒通義七卷。存。（東塾叢書本）

聲律通考十卷。存。（同上）

切韻考六卷。存（東塾叢書本，涵芬樓排印本）

切韻考外篇三卷。存。（同上，又北京大學出版部排

印本)

漢書地理志水道圖說七卷。存。(同上)

東塾讀書記十二卷。又三卷。附一卷。存。(家刻本，續經解本，商務印書館排印本。)

東塾集六卷。存。(菊坡精舍刻本，又另有梁鼎芬編本八卷。)

申范一卷。存。(同上，又古學从刊本)。

三統術詳說四卷。存。(廣雅書局刻，東塾遺書本)。

水經注西南諸水考三卷。存。(同上)

弧三角平視法一卷。存。(同上)

摹印述一卷。存。(同上，又印學从書本)。

說文聲表十七卷。存。(廖景曾藏本)。

孝經紀事一卷。(未見)。(自序見東塾剩稿)。

讀詩日錄一卷。存。(古學从刊本，微尚齋从刻本)。

聲律除考。未見。

古樂徵一卷。存。(廖景曾藏本)。

古樂餘論。未見。

等韻通一卷。未見。(東塾集卷三有自序)。

東塾類稿。存。(刻本)。

鍾山集。存。(刻本)。

初學編音學一卷。存。(自刻本，粟香四筆本)。

字體辨誤一卷。存。(刻本)。

學海堂志續。存。(附刻學海堂志各章後)。

- 老子注一卷。存。(汪兆鏞先生藏鈔本)。
香山縣志二十二卷。存。(光緒五年刻本)。
自記一卷。存。(陳氏家藏彙本)。
水經注提綱四十卷。未見。
琴律譜一卷。存。(陳氏家刻本)。
東塾雜俎十卷。未見。
朱子語類日鈔五卷。存。(家刻本)。
陸象山書鈔六卷。存。(家鈔本)。
公孫龍子注一卷。存。(汪兆鏞先生校刊本)。
陳東塾先生遺詩一卷。存。(同上)
憶江南館詞一卷。存。(同上)
唐宋歌詞新譜。未見。(據東塾集卷三有自序)。
東塾隨筆。未見。
東塾剩藁。存。(陳氏家藏彙本)
讀陶淵明詩劄記。存。(鈔本)
識月軒詩話。未見。
陳東塾先生遺藁。存。(嶺南大學藏鈔本，曾摘登
嶺南學報二卷二、三期。又國立北平圖書館藏彙本)
東塾集外文四卷。存。(汪宗衍輯，未刻)。

蔣理祥

理祥字汝宸，號吉雲，東莞縣人。道光二十九年(公元一八四九年)己酉選拔。咸豐二年(公元一八五二年)壬子領鄉舉，越年成進士，選庶吉士。同治三年(公元一八六四年)奉旨免令散館，特授編修。當道聘主龍溪書院講席，以德

行講士，脯修外不妄取一錢。地方義舉，罄所有不之吝。弱冠時館潘仕成家，仕成輯海山仙館叢書，殫心檢校，垂二十年。後仕成獲罪，查抄，力為營救。曰：「非敢市義，少受魯子敬恩弗敢忘，所以報也。」（據東莞陳志，東莞詩錄）。
箸書：（有詩集曾錄入東莞詩錄中）

容鶴齡 鶴齡字青田，東莞人。少承家學，有文名。咸豐十一年（公元一八六一年）辛酉領鄉薦，同治二年（公元一八六三年）癸亥成進士。授知縣，以折腰非所好，援例為六部補用郎中。性夷曠，誘掖後進無不至。掌教龍溪書院十餘年，多所裁成。其邑中鳳臺詩社，久歇絕。鶴齡提倡風雅，為詩課，他邑人投詩者毋慮數十百篇。吟芷居詩話云：「吾邑自賴介山，簡東洲後，何梅士陳友珊兩夫子，及羅秋浦明經繼起主持風雅，故邑令能詩者甚多。光緒某年，容青田夫子提倡續鳳臺詩社，月課一詩」。其後倣行之，到今不絕。（據東莞陳志，吟芷居詩話。）

箸書：待考

鄧佐槐 佐槐字振勳，號曠侯，東莞縣人。少聰穎，五齡隨遊古刹，默識楹帖，無遺誤。同治六年（公元一八六七年）丁卯領鄉舉第一，逾年成進士，授禮部主事。光緒四年（公元一八七八年）戊寅勳辦惠陵工竣，加四品銜。踰年丁內艱，歸里。以少孤不獲留倚養，哀毀幾絕。家居啓籬，得親友券無力償者悉焚之。十年（公元一八八四年）入都，補祠祭司主事。尋回籍，主龍溪，寶安書院，莞人士多從之遊。其邑人以

『一時』兩字爲十一言夾聯請其評閱，有卷云：『一生書債還待文章有價時』者，取列第一，蓋以暗合其身世也。有亦蘧廬詩草，中多構思之作，如燕臺詩云：『獨憐伏櫪長鳴者，不爲黃金不肯來』。題團扇牡丹云：『自從富貴名相被，減却天香一半春』。可見其懷抱也。（據東莞陳志，吟芷居詩話）。

箸書：中法戰爭記。存。（彙藏於家）。

亦蘧廬遺藁。存。（同上）。

亦蘧廬詩草。存。（張其淦編選，未刻）。

黃 嶠

嶠原名家駒，字景崙，東莞縣人。少劬學，工書法。年十八，補諸生，領同治九年（公元一八七〇年）庚午鄉薦。逾年聯捷成進士。授刑部主事。性廉靜，不事奔競。與歸善鄧承修，楚北楊守敬爲文字交，搜藏六朝碑帖數百軸，終日研求，遂精金石之學。書法亦益進，爲當時所重。以親老南歸，邑令張琮延主龍溪書院。歷主惠州豐湖香山翠微增城炳蔚各書院，士薰其教，悉皆成通才。親歿，改知縣，授陝西洋縣令，旋罷歸。（據東莞陳志）。

箸書：刑案異聞錄十卷。未見。（據聞有筆記藏於家，詳論時政得失，有董狐直筆）。

崔永安

永安字磐石，正白旗漢軍人。光緒五年（公元一八七九年）庚午鄉薦，逾年聯捷成進士。散館授編修。旋丁憂回籍，大府聘主龍溪書院，多所裁成。官至浙江，直隸布政使，護理直隸總督。晚年隱居上海，卒於杭州。工書法，善畫梅花，年六十，猶能作蠅頭小楷，見嶺南畫徵錄。（據張豫泉丈說）。

著書：待考

張其淦 其淦字豫泉，東莞縣人。光緒五年（公元一八七九年）己卯領鄉薦。十年（公元一八八四年）補學海堂專課肄業生。十八年（公元一八九二年）壬辰成進士，二十年（公元一八九四年）補殿試，授庶吉士。散館，改山西黎城縣知縣，在任四年。義和團之亂，教民七名被戕，以保教不力被參。回籍，大府聘主龍溪書院七年。照舊制課詩文之外，又仿學海堂成法，兼課經史詞章，每月榜其佳作於文源書舍，聚觀甚衆，裁成不少。後改捐安徽候補道，宦皖三年。宣統二年（公元一九一〇年）夏，署安徽提學使。民國改元後，寓居上海，著述自娛。今尚健存，年七十六。

著書：邵村學易二十卷。存。（民國十五年印本）。

洪範微一卷。存。（排印本）。

左傳禮記十卷。存。（排印本）。

老子約六卷。存。（排印本）。

松柏山房駢體文鈔四卷。存。（家刻本）。

夢痕仙館詩鈔二十卷。存。（同上）。

五代詠史詩鈔六卷。存。（同上）。

邵村詠史詩鈔十八卷。存。（同上）。

明代千遺民詩詠初編十卷。存。（民國二十年排印本）。

明代千遺民詩詠二編十卷。存。（民國二十年排印本）。

明代千遺民詩詠三編十卷。存。(民國廿一年排印本)

元八百遺民詩詠八卷。存。(民國二十二年排印本)

東莞詩錄六十五卷。存。(家刻本)

吟芷居詩話四卷。存。(附東莞詩錄後)

春秋教旨二卷。未刻。

春秋持平十卷。未刻。

讀老隨筆十卷。未刻。

莊子旨歸十卷。未刻。

郭子翼莊偶釋一卷。未刻。

讀列隨筆二卷。未刻。

寓園文鈔二卷。未刻。

兩漢史論二卷。未刻。

孟子學說十卷。未刻。

紫筠籍雜綴四卷。未刻。

桂 坊 坊字南屏，南海縣人。光緒十四年(公元一八八八年)選廣雅書院肄業生。十七年(公元一八九一年)選學海堂專課肄業生。是年，領辛卯鄉薦。二十年(公元一八九四年)，成甲午恩科進士，改庶吉士。散館授檢討。保送浙江知府。曾主龍溪書院講席，今尙健存，年近七十。(據張豫泉丈說)。箸書：晉專宋瓦室類彙五卷。存。(光緒戊戌刻本)

尹慶舉 慶舉字策廷，號翔墀，東莞縣人。年十六補邑弟子員。光緒十七年(公元一八九一年)辛卯舉於鄉，二十一年(公元一

八九五年)乙未成進士,選庶吉士,旋授編修。二十六年(公元一九〇〇年)庚子考試差,列高等,有內閣請謁,曰:『予千金,學差可得也』。慶舉婉謝,或問之,曰:「學臣爲多士矜式,己不正,如正人何!」遂告歸,大府聘主龍溪寶安書院講席,以實學課士。又以科舉爲世詬病,與莞令劉德恆設勸學所,縣立初級師範暨小學各校。莞人學堂之設,遂爲吾粵先。三十一年(公元一九〇五年)入都供職,歷充國史館纂修,編書處協修,及詳校官。宣統元年(公元一九〇九年)京察一等,賞侍講銜,充實錄館纂修。旋以閩浙賑捐賞花翎。宣統三年(公元一九一一年)京察以道府配名,九月授成都遺缺知府。將行,會革命軍起,未能赴任,遂回里,不復出,性謙厚,遇事審慎,不執己見。與人交,無貴賤,一接以禮,人樂親之。民國四年連丁父母之艱,哀毀成疾,十月終於里,年五十四。(據東莞詩錄,吟芷居詩話,蘇澤東祖坡吟館樵談)。

著書:待考

(乙)、生徒

當時生徒狀況,以無院中文獻可據,蒐討更爲困難,現綜核所得,信而有徵者,計得:何仁山,陳伯陶,張其淦三人,其餘概俟考焉。

何仁山 仁山字顯貞,號梅士,東莞縣人。夙承家範,敦品勵學,工詩文。肄業龍溪書院時,爲博羅韓榮光所器重。今其集中,有:題韓珠船師蒲團揮塵圖(圖作僧服),龍溪漁隱圖韓珠船師命題諸篇,蓋師而友者矣。道光二十九年(公元一八

四九年)領己酉鄉舉第一,主司何紹基深賞其文,時稱名元。以其季父鯤案被累,不得預會試。性孝友,事親能以色養,視兄弟如手足,館穀不以自私,數十口,世同居爨,怡然自樂。咸豐七年英法聯軍陷廣州,仁山集團防禦,欽差羅惇衍,龍元僖,蘇廷魁,咸倚重焉。事平,海保直隸州知州,以親老,絕意仕進。當道聘主寶安書院,居喪遵古禮,賻助者悉婉卻。生平不營生產,然爲人任事,不避怨,不居功。晚歲詩酒自娛,愛羅浮茶山之勝,構屋黃仙觀側,復營生壙於前,植梅環之,其曠達如此。吟芷居詩話云:『昔張南山先生主講寶安書院,韓珠船先生主講龍溪書院,何梅士夫子曾從之遊,故詩學具有淵源,寢饋於唐宋大家,而於國朝六家詩致力尤深,佳句甚多,難屈指數』。殆東莞三百年間詩人之首出者歟!(據東莞陳志,吟芷居詩話,張維屏聽松廬詩話,李文泰海山詩屋詩話)。

著書:草草草堂詩草二卷。存。(門人東莞何壽泉註刻)。

鋤月山房文鈔二卷。存。(門人東莞鄧蓉鏡刻於江西官署)。

東莞縣志稿 (據東莞陳志云,無卷數,原稿未見)。

陳伯陶

伯陶字象華,一字子礪,東莞縣人。少時與張其淦同肄業於龍溪書院。光緒五年(公元一八七九年)領己卯鄉薦第一,七年(公元一八八一年),選學海堂專課肄業生。十五年(公元一八八九年),考取內閣中書,充咸安宮教習。館李文田家。十八年(公元一八九二年)成壬辰進士,廷試一甲第三

名，授編修。歷充雲南，貴州，山東副考官，武英殿纂修，起居注協修，文淵閣校理，國史館總纂。光緒三十一年（公元一九〇五年）入直南書房。三十二年（公元一九〇六年）學部奏派赴日本考察學務，署江甯提學使。三十四年（公元一九〇八年）七月，署江甯布政使。宣統元年（公元一九〇九年）五月，再署江甯布政使。十一月，實授江甯提學使。二年（公元一九一〇年）三月，入覲，請假修墓。旋由粵督代表奏開缺養親。民國改元，奉母避地九龍，因家焉。自號九龍真逸，沈潛於著述。民國四年（公元一九一五年）從東莞邑人之請，設志局于九龍，纂修東莞縣志，民國十年（公元一九二一年）書成，凡九十八卷。（案：即本文所稱之東莞陳志是也）。後卒於九龍。（據陳寶琛撰墓誌銘，張學華撰傳，張豫泉文說）。

著書：孝經說三卷。存。（排印本）。

勝朝粵東遺民錄四卷。存。（聚德堂從書本）。

宋東莞遺民錄二卷。存。（同上）。

東莞五忠傳二卷。存。（排印本）。

重纂東莞縣志九十八卷。存。（排印本）。

瓜廬詩牘四卷。存。（排印本）。

瓜廬文牘四卷。外編一卷。未見。

宋臺秋唱一卷。存。（聚德堂從書本）。

輯袁督師遺稿三卷。未見。

東江考四卷。未見。

西部考二卷。未見。

增補羅浮志十六卷。存。(刻本)。

張其淦 詳見山長。

五、廢棄始末

及光緒三十一年(公元一九〇四年)詔廢科舉，興學校，院遂廢置。
莞人有營竹器業者，賃其地爲店。民國以後，未知鞠爲茂草否也。

贅語

吾爲此文既竟，携文請謁豫丈，豫丈曰：『院建凡二百六十餘年，吾莞人士以肄業其間者，蓋數百人，而足徵者寥若晨星，何其可憫歟！就余所知，如鄧蓮裳，葉子勤，莫友篋，莫天一諸氏無不肄業其間，惜乎文獻之不足也！苟能於吾邑各姓族譜各家遺乘而鈎稽之，當不止此數。卽推而廣之，於新修南海，番禺各縣志，及廣東舊檔案而盡翻檢之，則山長之數，亦不止此。他日勉之可也』。又曰：『當時院規甚嚴，正課生固當住院，卽山長亦不得遙領也。猶憶湖南汪頌年(名詒書)太史，來粵就其同鄉某大府，大府卽札給邑令劉子占(名德衡)，聘爲龍溪書院山長，聘書已發出矣，汪欲在廣州遙領，爲劉面折，遂不敢到任，則於此可見一斑矣！嗚呼！吾邑前輩爲學之勤篤，豈不以此哉！因爲附誌於此。

民國二十三年九月二十八日成於滬上四部書齋